

**Tekun: Borang permohonan sukar diproses tanpa sokongan pemimpin Umno**  
**Malaysian Insider**  
**Oct 9 , 2013**  
**OLEH DIYANA IBRAHIM**

Salah satu syarat wajib untuk mendapatkan pinjaman Tabung Ekonomi Kumpulan Usaha Niaga (Tekun) untuk perniagaan, anda perlu mendapatkan pengesahan daripada pemimpin tempatan atau dengan tepatnya merujuk kepada pemimpin Umno.

Perkara tersebut dinyatakan melalui borang permohonan pinjaman Tekun "JPP02" pada bahagian H yang memerlukan peminjam mendapatkan pengesahan pemimpin tempatan, wakil rakyat, syarikat rakan strategic atau Jawatankuasa Kemajuan dan Keselamatan Kampung (JKKK).

Percubaan The Malaysian Insider menghubungi tiga pejabat Tekun di Bandar Tasik Selatan, Shah Alam dan Ayer Keroh membuktikannya apabila mereka menyatakan ia adalah prosedur biasa yang harus dilakukan bagi memohon pinjaman selain perlu memberikan dokumen berkaitan lain.

"Anda perlu pergi ke pejabat Umno negeri untuk dapatkan tandatangan dalam borang tersebut kerana kalau borang tidak lengkap maksudnya kita tidak boleh proses permohonan," kata telefonis Pejabat Tekun Ayer Keroh, Melaka ketika dihubungi The Malaysia Insider semalam.

Perkara sama turut dinyatakan Pejabat Tekun Bandar Tasik Selatan, Kuala Lumpur dan Shah Alam, Selangor apabila mereka menyarankan untuk mendapatkan pengesahan yang hanya ditandatangani oleh pemimpin Umno atau wakil rakyat daripada parti Melayu itu.

"Kalau anda pergi ke semua tempat memerlukan perkara yang sama, lebih mudah datang sendiri ke pejabat," kata telefonis Pejabat Tekun Shah Alam.

Apabila ditanya apakah pegawai tempatan di dalam borang permohonan merujuk kepada pemimpin Umno, ketiga-tiga telefonis Pejabat Tekun di ketiga-tiga negeri itu mengesahkannya.

Tekun ditubuhkan pada 1998 sebagai sebuah institusi di bawah Kementerian Pembangunan Usahawan dan Koperasi.

Matlamat penubuhan Tekun pada ketika itu adalah untuk menyediakan pembiayaan modal dengan mudah dan cepat kepada golongan Bumiputera yang ingin melibatkan diri dalam bidang perniagaan dan menjadi usahawan.

Isnin lalu, Ketua Pengarah Eksekutif (CEO) Tekun, Datuk Abdul Rahim Hassan (gambar), berkata matlamat penubuhan Tekun ialah bagi membantu ahli Umno.

Rahim berata, Tekun mempunyai hak untuk mempertahankan tindakan tersebut kerana idea penubuhannya diasaskan oleh parti itu.

Kenyataan Rahim bagaimanapun dikritik pemimpin pembangkang kerana Tekun seharusnya bertindak membantu golongan Bumiputera tanpa mengira mana-mana parti politik.

PKR dalam satu kenyataannya semalam mendakwa ahli Umno gagal menjelaskan hutang

pinjaman Tekun sebanyak RM1 bilion.

Pengarah Komunikasi PKR, Fahmi Fadzil, berkata sejak Tekun ditubuhkan pada 1998, dana sebanyak RM2.42 bilion diberikan kepada 237,173 usahawan dan daripada jumlah tersebut RM1.6 bilion adalah dana daripada kerajaan pusat.

"Sejak ditubuhkan pada 1998 hingga awal tahun ini, hanya RM1.43 bilion dibayar balik.

"Jika ia dipadankan dengan kenyataan CEO Tekun tersebut, bermakna hampir 40.9 peratus jumlah yang dipinjamkan kepada amnya ahli Umno belum dibayar balik, iaitu hampir RM1 bilion," katanya merujuk kepada laporan yang diperolehnya melalui akhbar Utusan Malaysia bertarikh 9 Februari 2013.

Rahim Isnin lalu turut berkata, Tekun tidak begitu mementingkan bayaran daripada peminjam kerana pelannya yang fleksibel.

"Kita faham kesukaran kaum Bumiputera, ada masanya perniagaan tidak akan berjalan lancar dan mereka akan menghadapi kesukaran untuk membayar.

"Selalunya kes begini, kita ikut budi bicara berunding dengan pegawai kita berapa yang mereka boleh bayar," katanya.

Rahim berkata, Tekun memberi tempoh selama satu hingga lima tahun kepada peminjam untuk membayar mengikut jumlah pinjaman.

Katanya, Tekun menerima nisbah pembayaran balik pinjaman hingga 70 peratus daripada jumlah keseluruhan pembiayaan atau purata sebanyak RM 25 juta sebulan. – 9 Oktober, 2013.

Hakcipta © 2013 The Malaysian Insider

Source:

<http://www.themalaysianinsider.com/bahasa/article/tekun-borang-permohonan-sukar-diproses-tanpa-sokongan-pemimpin-umno>